



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՐԴ

ք. Երևան

10.01.2018թ.

Ո Ր Ո Շ ՈՒ Մ ՀՀ գնումների բողոքարկման խորհրդի թիվ ԳԲԽ-ԷՍ-2017/54

ՀՀ գնումների բողոքարկման խորհուրդը՝ (այսուհետ՝ նաև խորհուրդ) քննելով «Մորմ» ՍՊԸ-ի 13.12.2017թ. ներկայացրած բողոքը (այսուհետ՝ նաև Բողոք) և կից փաստաթղթերը, պարզեց հետևյալը.

1. «Մորմ» ՍՊԸ-ի ներկայացրած փաստերը, հիմնավորումները և պահանջը.

«Մորմ» ՍՊԸ-ն (այսուհետ՝ նաև Ընկերություն) ՀՀ գնումների բողոքարկման խորհրդին 13.12.2017թ. ներկայացրել է բողոք, որով հայտնել է հետևյալը.

«ՀԱԷԿ» ՓԲԸ-ի կարիքների համար՝ պահարանների ձեռքբերման նպատակով (այսուհետ՝ նաև ապրանք), որոնք խմբավորված են 3 չափաբաժիններում, հայտարարվել է ՀԱԷԿ-ԳՀԱՊՁԲ-43/17 գնման ծածկագրով ընթացակարգ, ինչին «ՄՈՐՄ» ՍՊԸ-ն որպես մասնակից 06.12.2017թ. հայտ է ներկայացրել երեք չափաբաժիններին մասնակցելու համար:

Սակայն, ՀԱԷԿ-ԳՀԱՊՁԲ-43/17 ծածկագրով իրանձնաժողովը հայտերի բացման նիստի արդյունքում արձանագրել և որոշել է համաձայն ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի 40-րդ կետի 4-րդ ենթակետի՝ «ՄՈՐՄ» ՍՊԸ-ի հայտը մերժել, քանի որ «ՄՈՐՄ» ՍՊԸ-ի հայտի Հավելված 10-ը՝ տուժանքի մասին համաձայնագիրը լրացված չէ հրավերով սահմանված կարգով՝ նշված չեն տնօրենի անձնագրային տվյալները:

Բացի այդ, Հանձնաժողովը ամբողջությամբ չի արձանագրել բոլոր մասնակիցների կողմից ներկայացված փաստաթղթերում առկա թերությունները: Մասնավորապես.

- «Օլանդա» ՍՊԸ-ի կողմից ներկայացված հայտում առկա են նմանատիպ բացթողումներ՝ Հավելված 10-ը՝ Տուժանքի մասին համաձայնագիրը լրացված չէ հրավերով սահմանված կարգով՝ նշված չէ հայտի ամիս ամսաթիվը, որն, ըստ ներկայացված օրինակելի ձևի, կրկին պարտադիր լրացման ենթակա է: Բացի այդ, վերոգրյալ կազմակերպությունը Հավելված 2.1-ում չի լրացրել անձնագրի տեսակը:

- Մասնակիցներից 7-ը հայտերը լրացրել են ARMEPS էլեկտրոնային համակարգին ոչ համապատասխան: Գնային առաջարկները պետք է լրացված լինեն համապատասխան ձևով առանձին ըստ յուրաքանչյուր չափաբաժնի ներբեռնված լինեն համակարգ: Սակայն, իրենց կողմից, օրինակ, գնային առաջարկի Հավելված 5-ը լրացվել է՝ ներառված բոլոր չափաբաժինները մեկ փաստաթղթում, և յուրաքանչյուր լոտի համար ներբեռնվել է նույն փաստաթուղթը:

Բողոքի փաստացի և իրավական հիմքերը, ապացույցները.

Չեն ապահովվել «Գնումների մասին» ՀՀ օրենքի 33-րդ հոդվածի պահանջները՝ հայտերի բացման նիստի արձանագրությունը սահմանված կարգով չի կազմվել և ստորագրվել, որից հետո այն պետք է ներկայացվեր Մասնակիցներին: Անգամ այն դեպքում, որ նիստը կասեցվել է, գնահատող հանձնաժողովի անդամները ուսումնասիրել են փաստաթղթերը և որոշում են կայացրել նիստը կասեցնելու մասին, ապա այդ փաստը պետք է արձանագրված լինի:

Չի պահպանվել «Գնումների մասին» ՀՀ օրենքի 38-րդ հոդվածի պահանջները՝ հավասար մրցակցային պայմանների ապահովում բոլոր մասնակիցներին: Տվյալ դեպքում «Օլանդա» ՍՊԸ-ի կողմից ներկայացված հայտում առկա բացթողումները և թերությունները չեն արձանագրվել ամբողջությամբ և 12.12.2017թ. նիստի թիվ 2.1 արձանագրությամբ ճանաչվել է որպես առաջին տեղ զբաղեցնող մասնակից: Միաժամանակ հայտնում եմ, որ ուսումնասիրելով թիվ 2.1 արձանագրությունը ակնհայտ է դառնում, որ արձանագրությունը կազմվել է կանխավ, ինչի մասին վկայում են արձանագրության մեջ առկա անհամապատասխանությունները:

Հանձնաժողովը չի ապահովել ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի 41-րդ կետի պահանջի կատարումը՝ հնարավորություն չտալով Մասնակցին լրացնել Հավելված 10-ը: Խնդիրը կայանում է նրանում, որ Մասնակցի տնօրենի անձնագրային տվյալների չլրացնելը

անհամապատասխանություն չէ, այլ բացթողում է կամ թերի լրացում: Անհամապատասխանություն կարող էր լինել, եթե դրա հետևանքով լրացված փաստաթուղթի նպատակային կիրառումն անհնար լիներ, կամ տուժանքի գումարը անհամապատասխան լիներ սահմանված պահանջներին, կամ լրացված փաստաթուղթը չհամապատասխաներ օրինակելի ձևին:

Հաշվի առնելով այն հանգամանքը, որ տվյալ փաստաթղթի՝ Հավելված 10-ի նպատակը մասնակցության հայտի ապահովումն է՝ մասնակցի կողմից պարտավորությունների չկատարման համար տուժանքի կիրառումն է, իսկ հաշվի առնելով այն հանգամանքը, որ մասնակիցը հանդիսանում է իրավաբանական անձ ու տնօրենի էլեկտրոնային ստորագրությամբ Հավելված 10-ը վավերացված է, ինչպես նաև կից ներկայացված է վճարման հանձնարարագիրը, ապա «Վճարման հանձնարարականով միջոցների փոխանցումների մասին» ՀՀ օրենքի 9-րդ հոդվածի /Վճարման հանձնարարականի վավերությունը/ համապատասխան Պատվիրատուն կարող է ինքնուրույն իրականացնել գումարի գանձումը Մասնակցից:

Բացի այդ, ՀՀ գնումների բողոքարկման խորհրդի 01.12.2017թ. թիվ ՍՅ-ԱՄ-2017/74 որոշման 2-րդ կետի 8-րդ պարբերությամբ ամրագրվել է հետևյալը.

«Նկատի ունենալով, որ գրության մեջ նշված մասնակիցը բովանդակային առումով կատարել է տուժանքի մասին համաձայնագրի լրացման պահանջները, ինչպես նաև այն, որ հիշյալ համաձայնագրում նշված ամսաթիվը չի կարող խոչընդոտել անհրաժեշտության դեպքում մասնակցից հայտի ապահովման գանձման գործընթացին, գտնում ենք, որ նման իրավիճակում ձևական սխալների պատճառով հայտի անբավարար գնահատման համար հիմքեր առկա չեն»:

Ելնելով վերոգրյալից, խնդրում ենք «ՄՈՐՄ» ՍՊԸ-ի սխալը ճանաչել որպես «անբավարար գնահատման համար հիմքեր առկա չեն»:

29.12.2017թ. «Մորմ» ՍՊԸ-ն խորհրդին է ներկայացրել միջնորդագիր, որով Ընկերությունը շարադրել է Բողոքին առնչվող լրացուցիչ հիմնավորումները: Մասնավորապես, Ընկերությունը նշել է, որ հաշվի առնելով այն հանգամանքը, որ «ՀԱԷԿ» ՓԲԸ-ի կողմից հայտարարված ՀԱԷԿ-ԳՀԱՊՁԲ-43/17 ծածկագրով գնման ընթացակարգին «ՄՈՐՄ» ՍՊԸ-ի կողմից հայտով ներկայացվել է Հրավերի Հավելված 2.1-ով նախատեսված «Մասնակցի իրական շահառուների մասին» տվյալները, համաձայն որի «ՄՈՐՄ» ՍՊԸ-ի միակ մասնակից է հանդիսանում Ընկերության տնօրեն Պարգև Վարդանյանը, և քանի որ վերոհիշյալ հավելվածով նախատեսվել է մասնակցի իրական շահառուների անձնագրային տվյալների

պարտադիր լրացման պայմանը, ապա ակնհայտ է, որ «ՄՈՐՄ» ՍՊԸ-ի տնօրեն Պարգև Վարդանյանի անձնագրային տվյալներն առկա են հայտում և ներկայացված են Հավելված 2.1-ով:

Ելներով վերը շարադրված հիմքերից, Բողոքը ներկայացրած անձը Խորհրդին խնդրել է.

1. Դադարեցնել ընթացակարգի գնահատող հանձնաժողովի 06.12.2017թ. բացման նիստի արձանագրությամբ կայացված «ՄՈՐՄ» ՍՊԸ-ի հայտը անբավարար գնահատելու մասին որոշումը:

2. Պարտավորեցնել հանձնաժողովին՝ «ՄՈՐՄ» ՍՊԸ-ին մասնակցելու ՀԱԷԿ-ԳՀԱՊԶԲ-43/17 ծածկագրով գնման ընթացակարգի հետագա գործընթացին:

Խորհրդում բողոքի քննության նպատակով տեղի ունեցած նիստերին մասնակցում էին «ՄՈՐՄ» ՍՊԸ-ի լիազորված ներկայացուցիչներ Արտակ Պողոսյանը և Ռաֆիկ Խանզադյանը:

2. «ՀԱԷԿ» ՓԲԸ-ի կողմից բողոքի վերաբերյալ ներկայացված փաստերը, հիմնավորումները և դիրքորոշումը.

«ՀԱԷԿ» ՓԲԸ-ն (այսուհետ՝ նաև Պատվիրատու) 20.12.2017թ. թիվ 40-3386 գրությամբ «Մորմ» ՍՊԸ-ի կողմից 13.12.2017թ. Խորհրդին ներկայացված բողոքի վերաբերյալ հայտնել է հետևյալը.

««Հայկական ատոմային էլեկտրակայան» ՓԲԸ-ի կարիքների համար պահարանների գնման նպատակով 28.11.2017թ. հայտարարված «ՀԱԷԿ-ԳՀԱՊԶԲ-43/17» ծածկագրով ընթացակարգի վերաբերյալ «Մորմ» ՍՊԸ-ի կողմից 13.12.2017թ. Խորհրդին ներկայացված բողոքն անհիմն է:

Հիմք ընդունելով ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի 40-րդ կետի 4-րդ ենթակետը՝ «Մորմ» ՍՊԸ-ի հայտը «ՀԱԷԿ-ԳՀԱՊԶԲ-43/17» ծածկագրով գնահատող հանձնաժողովի կողմից մերժվել է, քանի որ Հավելված 10-ում՝ տուժանքի մասին համաձայնագրում լրացված չեն եղել հրավերով պահանջվող տնօրենի անձնագրային տվյալները:

«Մորմ» ՍՊԸ-ին հավելված 10-ը շտկելու հնարավորություն չի տրվել, քանի որ ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի 41-րդ կետով սահմանվում է, որ հայտի ապահովումը և գնային առաջարկը շտկման ենթակա չեն»:

Խորհրդի նիստերին մասնակցում էին Պատվիրատուի լիազորված ներկայացուցիչներ Արման Դավթյանը և Հռիփսիմե Ռամազյանը:

3. ԳԲԽ-ԷՍ-2017/54 բողոքի քննության համար էական նշանակություն ունեցող փաստերը, Խորհրդի հիմնավորումները և եզրահանգումը.

Խորհուրդն ուսումնասիրել է «Մորմ» ՍՊԸ-ի կողմից 13.12.2017թ. Խորհրդին ներկայացված բողոքը և կից փաստաթղթերը, Բողոքի վերաբերյալ Պատվիրատուի 20.12.2017թ. թիվ 40-3386 գրությամբ ներկայացված դիրքորոշումը, «ՀԱԷԿ-ԳՀԱՊՁԲ-43/17» ծածկագրով գնանշման հարցման հրավերը (այսուհետ՝ նաև Հրավեր), «ՀԱԷԿ-ԳՀԱՊՁԲ-43/17» ծածկագրով գնանշման հարցման ընթացակարգի գնահատող հանձնաժողովի (այսուհետ՝ նաև Հանձնաժողով) 06.12.2017թ. նիստի թիվ 2 արձանագրությունը, «Մորմ» ՍՊԸ-ի կողմից ընթացակարգին ներկայացված հայտի պատճենը, Պատվիրատուի դիրքորոշումը և կարծիքը.

«ՀԱԷԿ» ՓԲԸ-ն պահարանների ձեռքբերման նպատակով 28.11.2017թ. armeps էլեկտրոնային գնումների համակարգի միջոցով հաշտարարել է «ՀԱԷԿ-ԳՀԱՊՁԲ-43/17» ծածկագրով գնանշման հարցման ընթացակարգ (այսուհետ՝ նաև Ընթացակարգ):

Ընթացակարգին ի թիվս այլ մասնակիցների հայտ է ներկայացրել նաև «Մորմ» ՍՊԸ-ն:

Հանձնաժողովը 06.12.2017թ. ժամը 15:00-ին կայացած նիստի թիվ 2 արձանագրության 5-րդ կետով որոշել է «Մորմ» ՍՊԸ-ի հայտը գնահատել անբավարար՝ հիմք ընդունելով ՀՀ կառավարության 04.05.2017թ. N526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 40-րդ կետի 4-րդ ենթակետը:

«Մորմ» ՍՊԸ-ն Խորհրդին ներկայացրած բողոքով հայտնել է, որ Հանձնաժողովը հայտերի բացման նիստի արդյունքում որոշել է «ՄՈՐՄ» ՍՊԸ-ի հայտը մերժել այն պատճառաբանությամբ, որ վերջինիս հայտի Հավելված 10-ը՝ տուժանքի մասին համաձայնագիրը, լրացված չէ հրավերով սահմանված կարգով, այն է՝ նշված չեն Ընկերության տնօրենի անձնագրային տվյալները:

Ընկերությունը Բողոքում մատնանշել էր Ընթացակարգին հայտ ներկայացրած այլ մասնակիցների հայտերում առկա նմանատիպ թերությունները, որոնք, ըստ Ընկերության, Հանձնաժողովի կողմից համապատասխան գնահատման չեն արժանացել: Նշված փաստը Ընկերությունը որակել էր որպես Հանձնաժողովի կողմից ոչ հավասար մրցակցային պայմանների ստեղծմանն ուղղված գործողություններ:

Բողոքի քննության նպատակով տեղի ունեցած նիստի ժամանակ Ընկերության ներկայացուցիչը պնդեց Բողոքով հայտնած դիրքորոշումն այն մասին, որ Հրավերի Հավելված 10-ի՝ տուժանքի մասին համաձայնագրի ներկայացման նպատակը մասնակցության հայտի ապահովումն է՝ մասնակցի կողմից հայտով ստանձնած պարտավորությունների չկատարման դեպքում տուժանքի կիրառումն է, իսկ հաշվի առնելով այն հանգամանքը, որ մասնակիցը հանդիսանում է իրավաբանական անձ և Հավելված 10-ը ստորագրված է տնօրենի էլեկտրոնային ստորագրությամբ, ինչպես նաև կից ներկայացված է վճարման հանձնարարագիրը, ուստի «Վճարման հանձնարարականով միջոցների փոխանցումների մասին» ՀՀ օրենքի 9-րդ հոդվածի (Վճարման հանձնարարականի վավերությունը) համապատասխան՝ Պատվիրատուն կարող է ինքնուրույն իրականացնել գումարի գանձումը մասնակցից, այսինքն, նշված փաստաթղթում տնօրենի անձնագրային տվյալների բացակայությունը որևէ կերպ չի կարող խոչընդոտ հանդիսանալ Պատվիրատուի կողմից հայտի ապահովման գումարը մասնակցից գանձելիս: Միաժամանակ, Ընկերության ներկայացուցիչը Խորհրդի ուշադրությունը հրավիրեց այն հանգամանքին, որ «ՀԱԷԿ» ՓԲԸ-ի կողմից հայտարարված «ՀԱԷԿ-ԳՀԱՊՁԲ-43/17» ծածկագրով գնման ընթացակարգին «ՄՈՐՄ» ՍՊԸ-ի կողմից հայտով ներկայացվել են Հրավերի Հավելված 2.1-ով նախատեսված «Մասնակցի իրական շահառուների մասին» տվյալները, որոնցում առկա են նաև «ՄՈՐՄ» ՍՊԸ-ի տնօրեն Պարգև Վարդանյանի անձնագրային տվյալները:

Պատվիրատուի ներկայացուցիչն ընդունեց այն փաստը, որ «ՄՈՐՄ» ՍՊԸ-ի կողմից հայտով ներկայացված Հավելված 2.1-ում առկա են Ընկերության տնօրեն Պարգև Վարդանյանի անձնագրային տվյալները՝ միաժամանակ նշելով, որ Ընկերության հայտը մերժելու որոշումը պայմանավորված է եղել այն հանգամանքով, որ վերջինիս հայտով ներկայացված տուժանքի մասին համաձայնագրում բացակայել է Ընկերության տնօրենի անձնագրային տվյալները, ինչը, ըստ Պատվիրատուի ներկայացուցչի, Հրավերի օրինակելի ձևով նախատեսված վավերապայմանի խախտում է: Ուստի, ղեկավարվելով Կարգի 40-րդ կետի 4-րդ ենթակետով, որի համաձայն՝ հանձնաժողովը մերժում է այն հայտերը, որոնցում բացակայում են գնային առաջարկը և (կամ) հայտի ապահովումը, կամ եթե դրանք ներկայացված են հրավերի պահանջներին անհամապատասխան՝ Հանձնաժողովը որոշել է «ՄՈՐՄ» ՍՊԸ-ի հայտը գնահատել անբավարար:

«Վճարման հանձնարարականով միջոցների փոխանցումների մասին» ՀՀ օրենքի 9-րդ հոդվածի 1-ին մասի համաձայն՝ վճարման հանձնարարականը վավեր է, եթե այն ուղարկվել է դրանում որպես ուղարկող նշված անձի կամ նրա ներկայացուցչի կողմից:

«Գնումների մասին» ՀՀ օրենքի (այսուհետ՝ նաև Օրենք)

- 32-րդ հոդվածի 1-ին մասի համաձայն՝ մասնակիցը հայտով՝ հրավերով սահմանված պահանջով ներկայացնում է հայտի ապահովում, որի չափը հավասար է հայտով առաջարկվող գնի մինչև հինգ տոկոսին: Հայտի ապահովումը ներկայացվում է միակողմանի հաստատված հայտարարության՝ տուժանքի կամ բանկային երաշխիքի կամ կանխիկ փողի ձևով:

- 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Կարգի՝

- 32-րդ կետի 1-ին ենթակետի «դ» պարբերության համաձայն՝ մասնակիցը հայտով ներկայացնում է հայտի ապահովում:

- 40-րդ կետի 4-րդ ենթակետի համաձայն՝ հանձնաժողովը մերժում է այն հայտերը, որոնցում բացակայում են գնային առաջարկը և (կամ) հայտի ապահովումը կամ եթե դրանք ներկայացված են հրավերի պահանջներին անհամապատասխան:

ՀՀ ֆինանսների նախարարի 2017թ. մայիսի 24-ի թիվ 237-Ա հրամանով հաստատված գնանշման հարցման ձևով էլեկտրոնային եղանակով կազմակերպվող բազային միավորի հնգապատիկը գերազանցող գնման հրավերի օրինակելի ձևի Հավելված 10-ով նախատեսված տուժանքի մասին համաձայնագրով (հայտի ապահովում) ի թիվս այլոց սահմանվել են հետևյալ վավերապայմանները՝ Ընկերության տնօրենի անուն ազգանունը, անձնագրային տվյալները, որոնք լրացվում են մասնակցի կողմից, իսկ Հավելված 2.1-ով՝ մասնակցի իրական շահառուների մասին տեղեկանքով՝ շահառուի անուն ազգանուն հայրանունը, ՀՀ քաղաքացիների համար՝ նույնականացման քարտի կամ անձնագրի կամ օրենսդրությամբ նախատեսված հաստատող փաստաթղթի տեսակը և համարը:

Այսպիսով, Խորհուրդն արձանագրում է, որ «ՄՈՐՄ» ՍՊԸ-ի կողմից ներկայացված հայտի Հավելված 10-ում՝ տուժանքի մասին համաձայնագրում լրացված չեն հրավերով պահանջվող տնօրենի անձնագրային տվյալները, սակայն վերջիններս առկա են Հրավերի Հավելված 2.1-ով նախատեսված «Մասնակցի իրական շահառուների մասին» տեղեկանքում (ID 003459435, տրված 26.12.201թ., 011-ի կողմից):

Խորհուրդն արձանագրում է նաև, որ Հանձնաժողովի կողմից Ընկերության հայտը մերժվել է վերջինիս հայտով ներկայացված տուժանքի մասին համաձայնագրում Ընկերության տնօրենի անձնագրային տվյալների բացակայության հիմնավորմամբ:

ՀՀ քաղաքացիական օրենսգրքի 370-րդ հոդվածի համաձայն՝ տուժանքի մասին համաձայնությունը պետք է կնքվի գրավոր՝ անկախ հիմնական պարտավորության ձևից: Գրավոր ձևը չպահպանելը հանգեցնում է տուժանքի մասին համաձայնության անվավերության:

Հաշվի առնելով, որ «ՄՈՐՄ» ՍՊԸ-ի կողմից հայտով ներկայացված տուժանքի մասին համաձայնագրում Ընկերության տնօրենի անձնագրային տվյալների բացակայությունը, ըստ էության, չի կարող արգելք հանդիսանալ շահառուի կողմից հայտի ապահովման գումարի գանձման համար, ինչպես նաև այն, որ Հրավերի Հավելված 2.1-ով նախատեսված «Մասնակցի իրական շահառուների մասին» տեղեկանքում առկա են վերը նշված տվյալները, խորհուրդը գտնում է, որ Ընկերության հայտը բովանդակային առումով ամբողջական է:

Այսպիսով, խորհուրդը գտնում է, որ Հանձնաժողովը՝ Ընկերության կողմից «ՀԱԷԿ-ԳՀԱՊՁԲ-43/17» ծածկագրով գնանշման հարցման ընթացակարգին ներկայացված հայտը Ընկերության տնօրենի անձնագրային տվյալները բացակայության հիմնավորմամբ մերժելով՝ գործել է ոչ իրավաչափ:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 1-ին կետի «բ» և «գ» ենթակետերով՝ ՀՀ գնումների բողոքարկման խորհուրդը


Ո Ր Ո Շ Ե Ց

1. «ՄՈՐՄ» ՍՊԸ-ի կողմից 13.12.2017թ. ներկայացրած բողոքը բավարարել:
2. Դադարեցնել ընթացակարգի գնահատող հանձնաժողովի 06.12.2017թ. բացման նիստի արձանագրությամբ կայացված «ՄՈՐՄ» ՍՊԸ-ի հայտը անբավարար գնահատելու մասին որոշումը:
3. Պարտավորեցնել ընթացակարգի գնահատող հանձնաժողովին՝ ընդունել որոշում՝ «ՄՈՐՄ» ՍՊԸ-ին «ՀԱԷԿ-ԳՀԱՊՁԲ-43/17» ծածկագրով գնման ընթացակարգի հետագա գործընթացին մասնակցելու հնարավորություն տալու մասին:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

ՀՀ գնումների բողոքարկման
խորհրդի անդամ՝



ԷՄԻԼ ՍԱՐԳՍՅԱՆ